

SMTIda nemis jurnalisti bilan uchrashuv bo'lib o'tdi



Joriy yil 13-sentabrdada SMTIda Institut direktori Eldor Aripov va Germaniyaning "Berliner Zeitung" gazetasi geosiyosiy bo'limi rahbari Tomas Fasbender o'rtaida uchrashuv bo'lib o'tdi.

Suhbat chog'ida Germaniya Federal kansleri Olaf Sholsning tashrifi oldidan O'zbekiston va Germaniya o'rtaisdagi ko'p tomonlama hamkorlikni kengaytirish masalalari yuzasidan fikr almashildi.

Germaniya mamlakatimiz mustaqilligini birinchilardan bo'lib tan olgan O'zbekistonning Yevropadagi eng muhim hamkorlaridan biri. Berlin 30 yildan ortiqroq vaqtidan beri O'zbekistonning barqaror rivojlanishini samarali qo'llab-quvvatlab kelmoqda. Intensiv siyosiy muloqot davom ettirilib, parlamentlararo aloqalar izchil rivojlanmoqda. O'zaro tovar ayriboshlash ko'lami kengayib, qo'shma sarmoyaviy loyihalar ro'yxati kengaymoqda.

Shular fonida kansler O.Sholsning O'zbekistonga bo'lajak rasmiy tashrifi ikki tomonlama kun tartibini yangi "yutuqli" yo'nalishlari bilan to'ldirish va hamkorlikni har tomonlama sheriklik darajasiga olib chiqish imkonini berishiga ishonch bildirildi.

Suhbatdoshlar o'zaro munosabatlarni mustahkamlashning bugungi ijobiy dinamikasini yuqori baholab, kasb-hunar ta'limi, kadrlar tayyorlash va malaka oshirish kabi sohalarda hamkorlik qilish uchun mavjud imkoniyatlarga e'tibor qaratdilar. Ulkan demografik salohiyatga ega zamonaviy O'zbekiston uchun bu sohalar ulkan qiziqish uyg'otadi.

O'z navbatida Germaniya ham ushbu sohalardagi hamkorlikni kengaytirishdan manfaatdor. Ba'zi hisob-kitoblarga ko'ra, Germaniya bugungi kunda 2 million kishilik ishchi kuchi yetishmasligini boshdan kechirmoqda va 2035-yilga kelib bu ko'rsatkich qariyb 7 millionni tashkil etadi.



Toshkentning so'nggi yillarda Afg'oniston yo'nalishida olib borayotgan konstruktiv siyosati ham mehmon e'tiborini tortdi. O'zbekiston Kobulni savdo-iqtisodiy aloqalarga maqsadli jalg etib, o'z hududida afg'on mutaxassislarini tayyorlashga ko'maklashayotgani, ijtimoiy-iqtisodiy muammolarni hal etishga ko'maklashayotgani, muntazam ravishda insonparvarlik yordami ko'rsatilayotgani ta'kidlandi.

Bundan tashqari, Afg'onistonning iqtisodiy tiklanishi, mintaqalararo savdo aloqalariga izchil jalg etilayotgani bu mamlakatda mustahkam va barqaror tinchlikka erishishda muhim omil bo'layotgani alohida ta'kidlandi. Barqaror Afg'oniston nafaqat transmintaqaviy aloqalarni mustahkamlash, balki Yevroosiyoning keng makonida xavfsizlikni saqlash uchun noyob strategik imkoniyatlarni ochib beradi.

Uchrashuvda tomonlar O'zbekiston Germaniya va Markaziy Osiyo mamlakatlari o'rtasida Afg'oniston masalalari bo'yicha muntazam ekspertlar muloqoti uchun muhim platforma ekanligini ham e'tirof etdilar. Shunday qilib, joriy yil 27-avgustda Toshkentda Germaniyaning Roza Lyuksemburg jamg'armasi bilan hamkorlikda "Afg'oniston Tolibon hukmronligi ostida – mintaqaviy va global o'yinchilarning pozitsiyasi" mavzusida davra suhbatni tashkil etildi. Joriy yil 11-12 sentyabr kunlari SMTI va Germaniyaning Konrad Adenauer jamg'armasi "Markaziy Osiyo va Afg'oniston: umumiy kelajakka nazar" mavzusida xalqaro davra suhbatini muvaffaqiyatli o'tkazdi.

Berliner Zeitung - Berlin-Brandenburg mintaqasidagi (GFR) eng katta tirajli kundalik gazeta. 1945-yil 21-mayda tashkil etilgan. U dastlab GDRda nashr etilgan, biroq mamlakat qayta birlashgandan so'ng Berliner Zeitung G'arbiy Germaniya ommaviy axborot vositalari tomonidan sotib olindi va Berlindagi yetakchi gazeta sifatida tan olindi.